



Broj: 01,02,03,03/11-05-1-2394/18  
Sarajevo, 10. 12. 2018.

B

PRIMLJENO. 24-12-2018			
Organizaciona jedinica	Klasifikaciona oznaka	Redni broj	Broj priloga

**IZVJEŠTAJ SA SEMINARA IPU-a O POSTIZANJU CILJEVA ODRŽIVOG RAZVOJA  
GEOPOLITIČKE GRUPE 12 + I PARLAMENTA ISTOČNE AZIJE**

20-22. novembar 2018. godine, Jerusalem, Izrael

Delagacija Parlamentarne skupštine BiH, u kojoj su bili Predrag Kožul, član Delegacije PSBiH u IPU-u, i Marin Vukoja, sekretar Predstavničkog doma Parlamentarne skupštine BiH, učestvovala je od 20. do 22. novembra 2018. u Jerusalemu na dvodnevnom seminaru o postizanju Ciljeva održivog razvoja, koji su za članove IPU-ove Geopolitičke grupe 12+ i parlamenata Istočne Azije zajednički organizirali IPU i Kneset Izraela.

Seminar, na kojem su učestvovali predstavnici parlamenata iz 20 zemalja Jugoistočne Evrope i Istočne Azije, otvorio je predsjednik Kneseta Izraela Yuli Yole Edelstein, koji je rekao da je održavanje ovog seminara prekretnica za Izrael i koji će doprinijeti jačanju saradnje s parlamentima širom svijeta.

Cilj ovog seminara bio je da se parlamentarcima omogući da podijele iskustva i da se uključe u sveobuhvatne rasprave o načinima realizovanja Ciljeva održivog razvoja do 2030.godine, kako je i predviđeno Agendom Ujedinjenih nacija.

U uvodnom dijelu seminara učesnicima su se obratili i predsjednica IPU-a Gabrijela Kuevas Baron i predsjednik Predstavničkog doma Parlamenta Kipra Demetris Siloris koji su upozorili da do 2030. godine nije ostalo još mnogo vremena i da je potrebno da se svijet, ispunjavajući COR i Agendu 2030, ujedini i zajednički radi na suočavanju sa izazovima današnjice.

Na četiri sesije tokom dva dana parlamentarci su diskutirali o Agendi održivog razvoja, te o prioritetima država i aktivnostima koje su promovirane do danas i na državnom i na regionalnom nivou. Svoja iskustva i naučene lekcije tokom sesija podijelili su i zvaničnici Kneseta, stručnjaci iz Ujedinjenih naroda, IPU-a, te civilnog društva.

Posebna pažnja bila je posvećena postizanju održivog razvoja kroz promociju nauke, tehnologije i inovacija, koji se smatraju ključnim pokretačima ne samo ekonomskog

rasta, nego su i bogat izvor ideja za postizanje ciljeva održivog razvoja od iskorjenjivanja siromaštva do poljoprivrede, zdravlja, čiste vode i energije, kao i klimatskih promjena.

Kako inovacije ne trebaju biti samo pitanje nauke i tehnologije nego i dio javne politike i administracije, drugog dana seminara predstavljen je višegodišnji projekat pod nazivom Zeleni Kneset započet 2014. godine, a koji je, vođen konceptom održivosti, Kneset pretvorio u najzeleniji parlament u svijetu. Nekoliko projekata koji su bili fokusirani na struju i vodu doveli su do samostalne proizvodnje električne energije konstruiranjem solarnih panela površine 4500 kvadratnih metara, te do značajnih ušteda struje i vode nizom pametnih rješenja. Uštedeni novac se po osnovu ovog projekta sakuplja u zeleni fond koji je zamišljen da nastavi projekat Zeleni Kneset, ali i za poboljšavanje uslova svih zaposlenih u parlamentu. Izraelski parlamentarci su rekli da smatraju da je njihova dužnost kao predstavnika najvišeg zakonodavnog organa da zaštite generacije koje dolaze, te da će svojim primjerom, kojim se štedi energija, smanjuje zagađenje, čuva okoliš i štedi novac, inspirirati i druge zemlje na slične korake.

U nastavku seminara posebna sesija bila je posvećena inovacijama, što domaćini smatraju svojim najvrednijim resursom, a vide ih i kao nacionalno dobro od ključnoga značaja za ekonomski prosperitet. Učesnici seminara na ovoj tematskoj sesiji istakli su da je jačanje inovativnog ekosistema u zemljama i između zemalja presudno u tome, posebno jer svijet ide prema budućnosti koja se sve više zasniva na inovacijama i tehnologiji. Izraelski stručnjaci, koji, kako je rečeno, neprekidno rade na razvijanju novih tehnologija i osnivanju istraživačkih centara, podjelili su svoja znanja i iskustva sa učesnicima seminara pokazavši na koji način u mnogim nerezvijenim zemljama pomažu, uz pomoć visoke tehnologije i inovativnih rješenja, da ugrožena populacija ostvaruje minimum neophodnih uslova za normalan život. Na sesiji je rečeno i da tehnologija i nauka treba da rješavaju potrebe najugroženijih grupa stanovništva i da se nastoji da njihovi benefiti budu dostupni svima.

U završnici seminara zaključeno je da je na nivou parlamenata od izuzetne važnosti da se razviju efikasni parlamentarni mehanizmi koji će osigurati koordinaciju i veći angažman institucije u pitanjima koji se tiču COR. Preporučeno je da svaka parlamentarna komisija razumije vezu između nadležnosti svoje komisije i COR, te da pronađu mehanizme za efikasno prevođenje COR u svoj rad. Parlamentarci su također pozvali na uspostavljanje snažnije bilateralne, regionalne i međunarodne ekonomske i političke saradnje između svih članica IPU-a, posebno s ciljem razvijanja zajedničkih projekata u oblasti infrastrukture, tehnologije i inovacije između zemalja, a što može biti osnova za mir, prosperitet i stabilnost u svim zemljama članicama.

Posljednjeg dana seminara učesnici su bili pozvani u terensku posjetu, kako bi se još jednom uvjerali u dodatnu vrijednost inovacija kao pokretača prosperiteta.

Zaključci i preporuke seminara će globalnoj parlamentarnoj zajednici biti predstavljeni i na 140. Generalnoj skupštini IPU-a koja treba da se održi početkom naredne godine u Dohi, u Kataru.

Izveštaj pripremila:


Nataša Čabak



Sektor za međunarodne odnose  
i protokol

Izveštaj odobrio:

Predrag Kožul



Član Delegacije PSBiH u IPU-u

Dostaviti:

- Kolegijumu Predstavničkog doma
- Kolegijumu Doma naroda
- članovima delegacije IPU-a u PS BiH
- Komisji za spoljne poslove PD PS BiH
- Sekretaru Predstavničkog doma PS BiH
- a/a